



सत्यमेव जयते

GOVERNMENT OF MIZORAM

BUDGET SPEECH

2020-21

8TH MIZORAM LEGISLATIVE ASSEMBLY

a

Pu Zoramthanga

HON'BLE CHIEF MINISTER

&

FINANCE MINISTER

Thusawi

Nilaini, February ni 19, 2020

MIZORAM SORKAR BUDGET 2020-21
FINANCE MINISTER THUSAWI

Pu Speaker,

I remtih'nain he House zahawm takah Kum 2020-2021 atana Budget Estimate leh tun kum kal mêk 2019-20 chhunga sum indaihlohna phuhrûkna tur Supplementary Demand for Grants te pharh tura ka lo ding thei hi ka lawm hle a ni.

2. Nikumah khan ram pum huap inthlanna neih chungchangah Model Code of Conduct puan a nih avangin Vote on Accounts kha kan pharh a. Tun tumah hian full Budget kan pharh thei dawn a, a lawmawm hle.

3. Pu Speaker, kumin hian Budget Session hi kum danga kan neih thin aia thla khat laia hmaah kan nei a, he thutlûkna huaisenthlâk tak hi Parliament-a Union Budget an pharh hnung zuina a nih piah lamah financial year tawp dawna hnawhsarum taka sum hman ral thin tih tlem tumna a ni a. January 2020 thla tawp aţang khan budget allocation siam belh a ni ta lo a, department te tan pawh kum tawp dawn tîpa sum tam tham tak hman ral kha a remchang dawn tawh lo a ni.

4. Hetih lai hian he House zahawm tak ka han hriattir duh chu Mizoram State Budget ruangâm hi Finance Commission te'n recommendation an siam danah a innghat thûk hle a. Tun hnai mai khan Union Cabinet chuan Fifteenth Finance Commission (FC-XV) term chu a pawtsei a, anni hian kum 2021-22 ațanga 2025-26 chhunga sum hmuh dan tur ruahmanna final report a la siam dawn chauh a ni. Chutih lai erawh chuan Fifteenth Finance Commission chuan kum 2020-21 atana Interim Report chu a theh lut tawh a. Sorkar laipui pawhin he Interim Report zultui hian Budget pawh a buatsaih nghe nghe a ni. Kum 2020-21 atan hian Finance Commission chuan Sorkar chhiah (Tax proceeds) hmuh tur zawng zawng ațanga 41% chu State hrang hrang 28 ten an insem turin a ruahman a. He ruahmanna anga Mizoram Sorkar chan tur chu 0.506% niin, a lungawithlâk thawkhat a. Amaherawhchu, Union Budget ațanga a taka kan hmuh tura ruahman chu Commission ruahmanna ai hian a la hniam zawk dawn niin a lang.

Heng bakah hian Fourteenth Finance Commission period chhung khan Post Devolution Revenue Deficit Grant (PDRDG) chu State 11-te tana ruahman niin, kum 2019-20 chhung pheih kha chuan State 7 chauh kan dawng tawh a. Tun tumah hian Fifteenth Finance Commission hian he Grant dawng tur hian State 14 lai

mai a rawn recommend ta a, hei hian Mizoram Sorkar chan tur pawh a rawn la hêk hle dawn a ni.

5. Heng thilte han thlir hian, Budget hlawk leh duhthusama tha chu kan beisei thei dawn lo a. Amaherawhchu, heng harsatnate hi mahni kea ding thei tura ke kan pen tanna atan te, sum hmuhna kawng hrang hrang dap chhuahna remchang atan tea kan hman theih chuan thil lawmawm tak a ni thei ang.

6. Hetih lai hian thil lawmawm lamte pawh kan dawng ve tho mai. He Finance Commission hian thingtlang lam thuam chakna tur (Rural Local Body Grant) ₹ 93.00 crore min pe a. Hei hi Finance Commission hmasa-ah khan pek kan ni lo va. Tun tumah hian Village Council kal tlanga thawh theih tur heti zat kan nei thei hi thingtlang lam mite tan a lawmawm hle a ni. Heng bakah hian khawpui tihhmasawna tur sum (Urban Local Body Grant) chu kum 2019-20-a kan dawn tur zat ₹ 37.00 crore atangin kum 2020-21 atan ₹ 45.00 crore ah tihsan sak kan ni a, hei hian khawpui tihhmasawna kawnga kan hmalakna te a tichak thei hle dawn a ni.

7. State Disaster Response Fund (SDRF) bikah kum kal mêka ₹ 18.00 crore kan hmuh chu kum 2020-21 ah chuan ₹ 47 crore ah tihsan sak dâwrh kan ni a. Hemi atanga 20% hi Commission

rawtna angin mitigation (khuarêl chhiatna tawrhna nasa zualpui tihnpna) atan bîk a hman theih dawn a, hei hian State sum a hrana indap chawp thin chu min chhâwk zangkhai thei hle dawn a ni.

8. Vawiinah hian thil lawmawm tak pakhat, he House zahawm taka han tarlan duh ka nei a, chu chu kan State sum thawhchhuah bik (State's Own Revenue)-a kan hmasawna hi a ni a. Kum kal lai mêk Budget-a kan thawhchhuah tura ruahmanna kha a hma kum ami aiin 27.97% in kan sà chho dâwrh a. Kha tih hun lai kha Sorkar-in Zu zawrh phalna kan tihtawp tantirh lai a nih avangin sum lakluhna pakhat awm dawn ta lo nen khan kil hrang hrang aţangin zawhna kan dawng a, khatiang *revenue estimate* sang kha a takah kan hmuh theih an ring lo. Mahse theihtawp kan chhuah a, December, 2019 thlenga kan *revenue* hmuh zat chu ₹ 836.39 crore a kai chho va, chu chu kumin chhunga kan beisei zat aţanga 83.16% zet a ni tawh a. Hetah hian a taka thawktu, Department hrang hranga kan Sorkar hnathawkte bakah, mipui, rilru inhawng taka Sorkar chhiah leh kawng hrang hranga sorkara chhunluh tur petute chungah lawmthu ka sawi a ni. Anni zarah hian kan la hmabak 16.84% hi chu tun *quarter* hnuhnung ber chhung hian harsa lo takin kan hmuchhuak ngei ang tih hi huai takin a sawi ngam a ni. Amaherawhchu, mahni intodelhna kawngah thui tak ke kan pen a la ngai tih chu kan theihnghilh lo vang chu.

MIZORAM ECONOMY DINHMUN THLIRNA

9. Pu Speaker, economic indicator thenkhat, Revenue Deficit leh Surplus te, Fiscal Deficit te, Sorkar leiba te hmanga Mizoram sorkar sum leh pai dinhmun thlirna tawi tê han neih hmasak ka duh a. Hengte hi State mipui zawng zawng sum thawh chhuah, Gross State Domestic Product (GSDP) ațanga teh a ni ber thin.

10. Mizoram hian sum leh pai dinhmun leh vantlang hmasawna kawngah ke a pen ve zel a. Kum 2020-21 chhunga kan GSDP chu ₹ 31,240.56 crore ni tura chhût a ni a, hei hi kum kal mēka kan GSDP ₹ 26,563.78 crore ațanga a thanna chu 17.61% a ni a, hei hi kum kal meka a thanna tura beisei 19.44% aini a hniam hret dawn a. Engpawh ni se, service sector ațanga kan thawh chhuah hi agriculture leh industry lamah kan thawh chhuahte aia a san fâl êm avangin, heng sector hrang hrang ațanga kan thawh chhuahte inbûk tawk tura tan lak erawh chu kan ngai a ni. Kum 2019-20 GSDP zat dik tak hriat hnuah a thanna dik tak hi chu a la hriat chauh ang.

11. State's Own Revenue ațanga kan hmuh tur chu *total revenue receipt* ațanga 12.72% ni tura chhût a ni a, hmasawna a tha hle, chu chu GSDP ațanga 3.98% a ni thung. GSDP ațanga chhût erawh hi chu nikum dinhmun nen a intluk tlang a ni.

12. Kan sum hmuhna hnar lam that tawk loh ngaihtuahin, revenue surplus ₹ 763.11 crore la neih hrâm kan tum a, hei hian capital investment lama sum mamawh engemaw chen a phuhru thei dawn a ni.
13. Kum 2020-21 chhunga Fiscal Deficit kan neih tur chu ₹519.69 crore a ni ang a, chu chu GSDP ațanga tehin 1.66% a ni ang. Primary Deficit pawh ₹ 150.02 crore a ni ang a, chu chu GSDP ațanga tehin 0.48% a ni ang.
14. Kum thar atana kan lei bat punna tur chu kum kal mek BE ațanga chhûtin ₹ 253.34 crore a ni dawn a. Tichuan, a vaia Sorkar leiba tlingkhawm zawng zawng chu Rs. 8701.26 crore a lo ni ang a, chu chu GSDP ațanga chhûta 27.85% a ni. Tun hnai kum 5 chhung khan kan State hian *debt sustainability* lamah kawng dik lam hawiin hma kan sawn hle a, GSDP ațanga chhûta kan than dan pawh hetiang hi a ni:- Kum 2015-16 ah **47.91%**; 2016-17 ah **41.09%**; 2017-18 ah **41.15%**; 2018-19 ah **32.89%**; 2019-20 ah **29.25%** te an ni a, kum 2020-21 ah pheichuan **27.85%** ah kan ding thei tawh dawn a, hei hi hmasawna tha tak a ni.

BUDGET ESTIMATES 2020-2021

I RECEIPTS:

A Revenue Receipts:

15. Kan hriat theuh angin kan State Sorkar sum hmuhna tlangpui chu State's Own Tax leh Own Non-Tax Revenue te, Sorkar laipui chhiah tling khawm insem (Share of taxes/Devolution) te, Sorkar laipui aṅanga Grants-in-Aid kan hmuh te leh Institution hrang hrang aṅanga Loans and Advances kan pūk te an ni.

16. State's Own Tax and Non-Tax Revenue:

Kan State chhung bika chhiah hrang hrang aṅanga hmuh kan beisei chu ₹ 661.69 crore a ni a, kum kal mêka kan hmuh tum ₹ 573.69 crore aiin 15.34% in a pung a. Hei bakah hian Non-Tax Revenue aṅangin ₹ 583.07 crore hmuh kan inbeisei a, chu chu kum kal mêka kan hmuh beisei ₹459.30 crore aiin 26.95% zetin a pung dawn a ni.

Tichuan, State's Own Tax leh Non-Tax hnuaia sum hmuh tur belhkhawm chu ₹ 1244.76 crore a ni dawn a, kum kal mêk BE aṅanga a punna chu 20.50% a lo ni ang.

17. **Tax Devolution:**

A pahnihnaah chuan, Sorkar laipuiin nakum 2020-21 chhunga kan hmuh tura a rawn tarlan chu ₹ 3967.96 crore a ni a, kumin BE atang chuan 2.13% in a pung a. A nihna takah chuan kumin aia 10% a sanga kan lo beisei laiin a taka kan dawn tur chu a hniam ta hle a ni.

18. **Grants-in-Aid:**

Fifteenth Finance Commission-in kan State Sorkar tana Grants a ruahman chu ₹ 1968.00 crore a ni a, kum kal meka kan sum hmuh tur aiin ₹ 748.00 crore lain a hniam a ni. Hei hian Post Devolution Revenue Deficit Grant (PDRDG) atana ruahman ₹ 1422.00 crore bakah Special Grant ₹ 546.00 crore a keng tel a ni. Hei hi Finance Commission hmasa in a lo recommend ai pawha a hniam zawk ngial avangin beisei loh dan tak a ni a, Mizoram tan chuan thil lawmawm lo tak a ni.

Hei bakah hian Grants dang dang atangin ₹ 185.00 crore kan dawng dawn a, chu chuan Rural Local Body Grants ₹ 93.00 crore te, Urban Local Body Grants ₹ 45.00 crore leh Disaster Response Fund atana ₹ 47.00 crore te a huam ang.

19. **Centrally Sponsored Schemes (CSS) leh Externally Aided Projects (EAPs):**

Centrally Sponsored Schemes leh Externally Aided Project atanga pawisa hmuh kan beisei zawng zawng chu ₹2033.39 crore a ni a. Tin, NLCPR, NEC, ST Welfare Grants leh Central Road Funds atangin Rs. 385.85 crore kan beisei bawk a ni.

20. Tichuan kum 2020-21 chhunga Revenue Receipt hmuh tura ruahman zat chu ₹ 9784.96 crore a ni.

B Capital Receipts:

21. **Internal Debts:**

Hmun hrang hranga atanga sum kan pûk tur ruahman zat chu ₹ 875.03 crore a ni. He *Internal Debts* hian a huam te chu – Market Loans atanga kan beisei ₹ 680.00 crore; NABARD Loan ₹ 170.00 crore; National Co-operative Development Corporation (NCDC) Loan ₹ 10.00 crore; Rural Electrification Corporation (REC) atanga pûk tur ₹ 5.00 crore leh Power Financing Corporation (PFC) loan ₹ 10.00 crore te an ni.

22. **Loans and Advances:**

External Aided Projects (EAP) loan portion leh kawng dang atangin ₹ 13.85 crore hmuh kan beisei.

23. **Recovery of Loans and Advances:**

Sorkar hnathawkte leh Co-operative Societies te'n loan an rullhna atangin ₹ 41.16 crore kan beisei bawk a ni.

24. Tichuan **Capital Receipt** atana hmuh kan beisei zawng zawng chu ₹ **930.04 crore** a ni a, chu chu kum kal mêka kan hmuh tur ₹ 845.30 crore aia 10.02% a sang a ni.

25. Tichuan **Revenue Receipt** leh **Capital Receipt** atanga sum hmuh kan beisei zawng zawng chu ₹ **10715.00 crore** a ni a. Chu chu kum kal mêk ami aiin ₹ 22.70 crore in a sang a ni.

II DISBURSEMENTS:

A REVENUE AND CAPITAL EXPENDITURES:

26. **Revenue Expenditure:**

Revenue expenditure atana sum hman tura ruahman zawng zawng chu ₹ 9021.85 crore a ni a, chu chu Budget estimate pumpui atanga 84.20% a ni.

27. Revenue expenditure han tih hian a huam zau hle a. Heng Sorkar hnathawk hlauh te, pension senso te, Interest payment

te bakah sector lian tak tak Education te, Sports te, kawngpui enkawlna te, power leina te, tui supply-na te, buhfai leina te, District administration te, Secretariat enkawlna te, Police te, Jail enkawlna te bakah State-in hmasawwna ruhrel (infrastructure) a lo din leh siam tawhte enkawlna te a huam vek a ni. Tin, tun hnai deuh aṅang khan Centrally Sponsored Scheme hrang hrang hnuaia Staff-te hlawh kan pekna thin thenkhat chu Central Sorkar-in a rawn titawp a, chungte chu State Sorkar-in kan lo tumsak vek rih avangin Revenue expenditure pawh hi a san phah hle bawh a ni.

28. Capital Expenditure:

Pu Speaker, Capital expenditure atana sum ruahman zawng zawng chu ₹ 1693.15 crore a ni a, chu chu Budget estimate pumpui aṅanga 15.80% a ni. Capital expenditure hi a tlangpuiin mipui tana hmasawwna ruhrel dinna hrang hrang – land and building te, kawng leh lei te, infiamna atana hmunhma siam leh hmanraw ṭha chhawpchuah te, tui lakna lama hmalakna te leh bungraw lian tham leina atana hmante hi a huam a. Central Sorkar-in State hrang hrangte Share of Taxes leh Deficit Grants atana sum min pek tur hi a tlak hniam avangin, keini pawhin kan State puala kan sum hmuhna tur kawng kan dap chhuah zel hi a pawimawh tak meuh a ni.

29. Tichuan, kum 2020-21 atana Revenue section leh Capital section atana sum hman tura ruahman zawng zawng chu ₹ 10715.00 crore a ni.

B SECTORAL ALLOCATIONS:

30. General Services Sector:

He Sector hian Sorkar inrelbawlina thahrui – Legislature, General Administration leh District Administration te, Election te, Fiscal Services (Finance and Accounts, Taxation, Land Revenue, Excise, Transports, Goods & Services) leh Home te a huam a.

He Sector atana sum hman tur ruahman zawng zawng chu ₹ 4073.08 crore (Revenue portion atan ₹ 3100.08 crore leh Capital portion atan ₹ 973.00 crore) a ni. Chu chu Budget pum pui atanga 38.01% a ni.

31. Social Services Sector:

Social Services Sector atana sum ruahman chu ₹ 3659.07 crore a ni a, Revenue portion atan ₹ 3553.32 crore leh Capital portion atan ₹ 105.75 crore te dah a ni a. Hei hi Budget pum pui atanga 34.15% a ni. Social Services Sector hian Education te, Health te, Water Supply leh Sanitation te, Local

Administration leh District Council te, Social Welfare te a huam a ni.

32. Economic Services Sector:

Economic Services atana sum ruahman chu ₹ 2790.83 crore a ni. Hei hian Revenue portion ₹ 2548.72 crore leh Capital portion ₹ 242.11 crore a huam. Hei hi Budget pum pui aṅanga 26.05% a ni.

Economic Services Sector hian Agriculture and allied Services te, Rural Development te, Irrigation leh Flood Control te, Industries leh Mineral lam te, Communication, Science & Technology, Environment leh Civil Supplies lam te a huam a ni.

C. ALLOCATION ON PRIORITY SECTORS:

33. Kan Sorkar Flagship programme, Socio Economic Development Programme (SEDP) hi kan State economy tihmasawna atana hmanraw pawimawh ber tur a ni a. SEDP-ah hian State Sorkar revenue pangngai aṅanga sum ruahman chu awm ve bawk mah se, hmasawna hna thawh nana kan ruahmanna pui ber erawh chu Project base-a hnathawh hi a ni

a. Central Sorkar hnuaia line Ministry hrang hrang leh ram pawn aṅanga sum leh pai hnuh luh theih turte kan ngaihtuah a. Heng sector hrang hrang Agriculture, Horticulture, AH & Vety, Commerce & Industries, Water Supply, Tourism leh Road Infrastructure-ah te hian Project lian tak tak siamin, Ministry hrang hrang leh multilateral agencies aṅanga ṅanpuina awm thei te hâihluh kan tum dawn a ni.

He kan hmalakna tichak tur hian Finance Department-ah EAP-Cell din a ni a, a pui turin Consultancy firm ṅha tak rawih a ni a. Consultant te hian Department hrang hrangte chu kan ram hmasawna atana thawh theih awm chi dap chhuah kawngah te, project atana concept paper siamna leh monitoring lamah te min pui dawn a ni.

34. Socio Economic Development Programme (SEDP) hi kan Flagship Programme a ni a, hemi hnuaia hna thawh nan kan resource neih aṅangin pawisa ₹ 51,300.00 lakh dah tura ruahman a ni a. Heta ṅang hian a hnuaia hna langsar zualte hi thawh a ni ang:-

a) Project hrang hrang atan sum lo lut tur lo do lêtna, Counterpart funding atan ₹ 20,000.00 lakh ruahman a ni a, hei bakah hian Department lamin project siam tura mithiam

an rawih nan leh DPR te siam nan ₹ 500.00 lakh dah a bawk.

- b) Tin, kum kal laia SEDP hnuiaia hna thawh kal mek chhonzawm zel nan ₹ 5,000.00 lakh dah a ni.
- c) Kawng siam leh enkawlina turin kum tharah ₹ 8,000.00 lakh ruahman a ni.
- d) Health Care hi kan Sorkar-in a ngai pawimawh êm êm a, Mizoram Sate Healh Care Scheme zawmtute'n an inenkawlina senso a hun taka an hmuh lêt zung zung theih nan ₹ 2,000.00 lakh chu Health Care atan ruahman a ni.
- e) Zoram Medical College-a mamawh hrang hrang phuhrûk nan ₹ 1,000.00 lakh ruahman a ni.
- f) Thalaite hmasawna leh Infiamna lam tihchangtlunna hi a pawimawh kan ti a, Youth developments atan ₹ 300.00 lakh leh Sports tihhmasawn nan ₹ 500.00 lakh ruahman a ni.
- g) Hei bakah hian kan thalai duhawm tak tak, ruihhlo-in a tihbuaite enkawl nan ₹ 500.00 lakh kan ruahman a ni.

- h) Heng zawng zawng bakah hian SEDP hnuaiah Department hrang hranga project pawimawhte thawh nan ₹ 13,500.00 lakh dah a ni a. Hei hi State Planning Board approval leh recommend-na anga hman a ni ang.
35. SEDP hnuaia road maintenance atana sum kan dah bakah a tul anga kawng enkawl nan leh tihhmasawn nan PWD hnuaia Road Fund Board in an hman atan ₹ 4,000.00 lakh chu ruahman a ni.
36. Kum 2020-21 chhung hian Fifteenth Finance Commission-in Rural Local Body Grant a ruahman angin kum hmasa lama kan neih loh, thingtlang lam tihhmasawna tur remchang kan nei dawn a, a lawmawm hle a ni. Hemi atan hian ₹ 9,300.00 lakh dah a ni.
37. State Disaster Response Fund atan ₹ 5,200.00 lakh dah tum a ni. Hetah hian ₹ 4,700.00 lakh chu Central Sorkar-in min tumsak ang a, ₹500.00 lakh chu State Sorkar tum tur a ni. He sum atanga 20%, ₹ 1040.00 lakh chu mitigation purpose atan hman theih a ni dawn a, hei hi kum danga kan tih theih loh, chhiat rupna lo thleng tur lo ven lawkna atan a hman theih dawn a, a lawmawm hle a ni.

38. ₹ 500.00 lakh chu Mizoram buai avanga dinhmun phette intuam hlawmna tur leh inbenbelna atana ruahman a ni bawk.
39. Nikum lama bul kan lo tan tawh Parking House Support Scheme (PAHOSS) chhunzawm nan ₹ 1000.00 lakh dah tura ruahman a ni.
40. Co-operative Societies te hi ram eibar zawwna kawnga hmanraw pawimawh tak an ni a. Subsidy awma loan an lak theihte tihpun zel nan kumin chhung hian hemi pualin ₹ 1,000.00 lakh chu ruahman a ni.
41. Kan State Sorkar sum dinhmun a tha tawh lo tih kan hre chungin, kan Autonomous District Council-te leh Development Council kan neihte hi kan thlahthlam thei lo va. Autonomous District Council pathumte tan hian ₹ 45,106.59 lakh ruahman a ni a, kum kal lai meka ruahman zat aia a tamna chu ₹ 4,999.62 lakh a ni a, a punna rate chu 12.47% a ni. Hei hi State Sorkar Budget punna rate atanga chhat chuan a sang hle a ni.
42. Hei bakah hian Sinlung Hills Council leh Sialkal Range Development Council-te tan ₹ 785.83 lakh ruahman a ni bawk.

III CHARGED LEH VOTED EXPENDITURE:

43. Kum 2020-21 chhunga expenditure estimate (Gross amount) chu ₹ 10895.26 crore a ni a. Heta ṭang hian Deduct Recoveries— FCS&CA leh Printing & Stationeries hnuaia buhfai leh Stationeries hralhna ₹ 180.26 crore kan paih hnuah Net expenditure estimate chu ₹ 10,715.00 crore a ni a, hei hi Receipt Estimate nen a inzat chiah a ni. Gross estimate aṭanga ₹ 814.25 crore chu Charged Expenditure a ni a, ₹ 10,081.01 crore chu Voted Expenditure, he House zahawm takin a pawmpui ngai a ni ang.

IV SUPPLEMENTARY DEMAND FOR GRANTS:

44. Pu Speaker, vawiinah hian kan Budget Estimate mai bakah, kum kal lai, 2019-20 Budget Estimate piah lama State Sorkar-in policy leh programme tihlawhtlin nana Department hrang hranga sum indaihlohna ka han pharh duh bawk a. Chung sum hmanna hrang hrangte chu – CSS, NEA leh NLCPR fund tlai khawhnua kan dawn ₹ 1575.96 crore te, Externally Aided Project leh NABARD aṭanga sum release lo kal tlai ₹ 275.83 crore te, leh State fund hrang hrang, Sorkar hnathawk hlawh

pung leh Pension te, development scheme hrang hrang thawh nana reprovion ₹ 1622.37 crore te an ni.

45. Tichuan Budget Estimate pawna *allocation* kan pek belh zawng zawng chu ₹ 3474.16 crore a ni a. Hemi aṅanga ₹ 76.03 crore chu *Charged Expenditure* a ni a, a bak ₹ 3398.13 crore hi he House zahawm tak pawmpui ngai, Voted Expenditure a ni.

V ECONOMY MEASURES:

46. Pu Speaker, a hma lama ka han tarlan tak ang khan, Central Sorkar aṅanga kan sum dawn tur hi tihhniam a lo ni ta a. Tuna Finance Commission kal mek, Fifteenth Finance Commission hian kumin kum tawp lamah final report an la thehlut chauh dawn a, eng angin nge recommendation a la siam zel dawn pawh sawi theih a la ni lo a. Hetiang dinhmuna kan lo din takah hian, Tax leh Non-Tax aṅanga kan revenue tihpun dan kawng zawn chu thil tihmâkmawh a ni dawn a ni.

Chutih rual chuan kan resource neih ang ang hi thiam taka kan hman a ngai dawn a. Hemi kawnga hma lakna pakhat kan tih mek chu Mizoram Vehicle Outsourcing Policy, 2019 hi a ni a. Hei hian Sorkar motor lei leh enkawlna senso thui tak a tikiam turah kan ngai a. Hetiang bawh hian, hnathawh tur hrang

hrangah a remchan dan ang zela *outsource* dan kawng dap zel pawh kan tum a ni. Heng bakah hian, sorkar chuan tul lova pawisa luang ral tur ven nan, inrenchemna kawng hrang hrangin a ngaihtuah baw k ang.

V CONCLUSION:

47. Pu Speaker, he Legislative Assembly-a member zahawm tak takten dawhthei tak leh uluk taka min ngaihthlak avangin lawmthu ka sawi a. Tichuan, i remtihnain, kum 2020-21 chhunga **Budget Estimates ₹ 10,081.01 crore (Cheng Vaibelchhe Singkhat leh Sawmriat Pakhat leh Nuai Khat)** chu he House zahawm taka sawiho tur leh pawmpui turin ka rawn pharh e.

48. Tin, kum 2019-20 chhunga Supplementary Demand for Grants **₹ 3398.13 crore (Cheng Vaibelchhe Sangthum Zathum Sawmkua Pariat leh Nuai Sawmpathum)** chu he House zahawm takin min pawmpui atan ka rawn pharh baw k e.

Ka lawm e.